

AGENDRE MIGU FAMAKAO YESU

MINGGU, 22 FEBRUARI 2026

1. FANGOWAI BA FOGAONI

(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).

- Fangowai :
SA : Ya'ami banua niha Keriso ni'omasi'ö Zo'aya ya'ita Yesu Keriso. No tarugi migu Wanörö tödö Famakao Yesu ma'ökhö, ma'owai ami: Ya'ahowu !
SATO : Ya'ahowu !
SA : Ya faofao khömi Lowalangi...
SATO : Ya fao Khöu Geheha-Nia
Fogaoni :
SA : Da ta'owuawua'ö dödöda wangondrasi Yehowa, da ta'omuso'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 26**

26. FEFU ITA DA TASUNO 2

do = d 4/4

MM = 88 - 96

1. Fefu ita da tasuno, Lowalangi So ' aya.
Me si sökhi tödö Ia, khöda fefu ba da ' a.
2. He iraono, he satua, da tasuno Zo' aya,
Me da' ö zomasi Ia, na oi tasuno Ia.

2. FANGA'ARO'Ö WA'OWULO (VOTUM)

- SA : Da tahonogö dödöda ba wariawösa, ba ba wa hasambua khö Lowalangi, (Muzizio zato):
No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

SATO : YADUHU

- SA : Na'i'angaröfi li ndra'o, ba Ufondrondrongo khönia, awönia ndra'o ba wamakao; U'efa'ö ia ba teturia ube'e. U'abusoi'ö ia fa'anau noso, ba anehe ia wangorifi andrö khö-Gu Ube'e. HALELUYA.....

SA : **Manunö** : BZ. : 452

- Migu Invocavit irugi Yudika, Mu'anunöisi
HALELUYA...HALELUYA...HALELUYA.....

- SA : Mangandrö ita :
He Yehowa Lowalangi, Ama sahakhö tödö ba sebua fa'omasi, si no umbu howuhowu ba fa'auri. Itörö tödöma wamakao Zo'aya ya'aga Yesu Keriso, No Ölulu nono-U omasiö ba danga zokhö horö: te'o'aya, tefakao, teforöfa ba mate börö horöma. Fahaö ndra'aga, fa'aboto ba dödöma ngawalö horö si no mafalua. Abölö'ö ndra'aga wolawa fa'abölö nösi, ena'ö mo'ahonoa ndra'aga ba wamalua somasi Nama, ba khö Zo'aya ya'aga Yesu Keriso ba ba Geheha Ni'amoni'ö, Yaduhu. **(Mudadao zato)**

3. MANUNÖ moroi ba Mbuku Zinunö Numero 236

236. RONGO WANGANDRÖ DÖDÖGU 1

do = g 4/4

MM = 88 - 96

1. Rongo wangandrö dödögu, So' aya Yesu.
He göi ira talifusö si no banua-U

Yesu, Yesu, rongo we' aogu.

He fe ' ao ndra talifusö, si no banua-U.

2. He Yesu sahakhö tödö, möido föna-Mö.

Usao' ö ngawalö horö, Ösasai do-Mö.

Reff: Yesu, Yesu, rongo we' aogu....

4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **Nehemia 1:4-11**

4. Ba me urongo duria andrö, ba mudadaodo tou, mege'egedo ba mangaröngarödo, mato dua wongi wa'ara; ba mamoni ba gö ndra'o ba mangandröngandrö ndra'o khö razo zorugo, umane:

5. "He Yehowa, Lowalangi ba zorugo, Lowalangi sebua ba sata'u ita, si lö mowu'ai fawu'usa li fa'ahakhö dödo andrö ba zangomasi'ö ya'ugö ba ba zolo'ö oroismö.

6. Be'e mbörö dalingamö ba bokai höröu, ena'ö örongo wangandrö genoniu andre, si lö ubato khöu iada'e, bongi ma'ökhö, salahi Ndraono Gizeraëli, enoniu andrö, wangombakha khöu horö Ndraono Gizeraëli, horöma khöu; he ya'odo andre, ba ya'aga si samba omo, ba oi si no molalö khöu.

7. No tenga side'ide horöma khöu, ba lö ni'o'öma oroismö, awö nifakhoimö, awö hukumö andrö, niwa'öu khö genoniu Moze.

8. Törö tödöu daroma limö andrö, niwa'öu, khö genoniu Moze, me ömane: Na molalö ami, ba ufazaewe ami ba niha baero!

9. Ba na mifalalini gera'erami, na mifuli ami khögu, ba na mibe'e ba dödomi goroisagu ba na mi'o'ö, ba he ba wondrege, ba gahe mbanua so nifazawili andrö khömi, ba u'ozaragö zui ira ba u'ohe mangawuli ba danö andrö, nituyugu, ba wamonahia töigu ba da'ö.

10. Noa sa atö enoniu ira ba banuau, ni'orifimö mege, ba wa'abölöu andrö, tangau sabe'e andrö.

11. He So'aya, be'e mbörö dalingau ba wangandrö genoniu andre ba ba wangandrö genoniu sato, somasi mangata'ufi töimö andrö: tolo, ena'ö mofozu nilau genonimö andre ma'ökhö, ba ena'ö falukha ia wa'ahakhö dödo razo andrö!" Ba ya'odo, ba same'e yomo gö khö razo.

Simanö daroma Li Lowalangi, da tatema'ö faoma sinunö: BZ.Numero 20:1

BZ. No: 20. MISUNOSUNO ZO'AYA

do = g, 4/4

MM = 96 - 104

1. Misunosuno Zo 'aya, mi bè zumange-Nia.

Mi 'ebua ' ö döi-Nia, sotöi banua-Nia.

Me no Ikaoni göi ami, afu mitemawa'au ri, khö Yesu, Sangorifi.

5. FANGANDRÖ FANGEFA HORÖ

SA

: Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

Mangandrö ita :

He Ama, Lowalangima sebua fa'omasi. Masuno ba ma'angaröfili Ndra'ugö Yehowa. Möiga ma'ondrasi Ndra'ugö ba nahia ni'amonio, ya'aga niha si no ra'io. Mafaduhu'ö wa tenga si nangea ndra'aga tanö föna-Mö, me no fahöna horö si no mafalua, he ba wehedema, era'era dödoma, awö gamuatama si lö faudu ba daroma Li-Mö. No ambö ndra'aga ba wangomasi'ö Ya'ugö soroi

dödö. Asese olifu ndra’aga wangandrö saohagölö ba howuhowu-Mö si no matema, ba no arörö ndra’aga ba gisö’isö dödö ba guli danö andre. Si tekiko ndra’aga ba horöma. Andrö ha fa’ahakhö dödö Nama ni’andröma. Bologö dödö-U khöma ba be’e aefa khöma horöma.....

- SATO : Mangandrö ba dödö zamösana föna Lowalangi.....1 irugi 2 meniti.
- SA : Hakhösi dödö-U khöma Ama, ba be’e aefa khöma horöma andrö ma’afefu...Yaduhu.
- SATO : Manunö : BZ. Numero 224 : 1

224. NA’UBINI’Ö HORÖGU KHÖ YESU

1. Na’ibini’ö horögu khö Yesu, ba lö usöndra za hono dödögu U’ombakha’ö ngawalö horögu, mo lala dödö.

- SA : **Turia Wangefa horö** : “Si manö sa wa’omasi Lowalangi nösi gulidanö, no Ibe’e Nono-Nia andrö, si ha sambua, ena’ö lö tekiko dozi samati khö-Nia, ena’ö so khöra wa’auri si lö aetu. LAKHÖMI KHÖ LOWALANGI SI YAWA.....
- SATO : Manunö:

450. BA FA’ATULÖ BA GULIDANÖ

do = d 4/4

MM = 74 – 84

1. Ba fa ’a tulö ba gulidanö ba niha ni’omasi ’ö andrö

(mudadao zato)

6. FOMBASO TAROMA LI LOWALANGI FÖNA HUHUAO (AB)

- : Da tafondrondrongo daroma Li Lowalangi, tehalö moroi ba zura **Matai’o 4:1-11**
1. Aefa da’ö, ba i’ohe ba danö si mate Yesu Eheha, ena’ö itandraigö ia Afökha.
 2. Ba me lö si manga ia, öfa wulu wongi wa’ara, ba olofo ia, me aefa da’ö.
 3. Ba möi khönia zanandraigö andrö, imane khönia: Na ono Lowalangi ndra’ugö, ba wa’ö, ena’ö tobali roti gara andre.
 4. Ba itema linia, imane: ”Tenga ha ba gönia auri niha, ba ngawalö li fefu, si otarai mbawa Lowalangi, auri ia”
 5. Ba i’ohe ia ba mbanua ni’amoni’ö andrö Afökha, ba mbumbu gosali ifa’aso.
 6. Ba imane khönia: Na ono Lowalangi ndra’ugö, ba tibo’ögö tou, noa sa so ba zura: ”Iwa’ö ba mala’ika andrö khönia dania, ba khömö andrö, ba lataya tangara ndra’ugö, fa lö manendre gaheu ba gara.”
 7. Imane khönia Yesu: So göi ba zura: ”Böi tandraigö Zo’aya, Lowalangiu.”
 8. Ba i’ohe zui ia Afökha, ifasao ba hili salawa sibai, i’oroma’ö khönia mbanua ba guli danö fefu, awö lakhöminia,
 9. ba imane khönia: Ahori ube’e khöu da’ö, na ötuhi danö, ba wanalulu khögu.
 10. Ba imane khönia Yesu: Beta’ögö Satana! Noa sa so ba zura: ”Khö Zo’aya, Lowalangiu, mangalulu ndra’ugö ba ha ya’ia öfosumange”.
 11. Awena iröi ia Afökha, ba hiza, ba la ondrasi ia mala’ika, mör ira ngonioninia.

Ya’ahowu zamondrongo taroma li Lowalangi ba same’e ba dödö.

- SA+SATO : Yaduhu

8. FASÖMBATA

- SA : Iada’e tebe’e khöda ginötö ba wolohe fasömbata khö Lowalangi. Ta’osamuzaigö wame’e, he fasömbata si föföna, ba simanö göi zi mendrua awö zi medölu, sifao fangowulo fasömbata sanandrösa ba pembangunan Rumah Dinas Pendeta Resort. Ba si föföna ua da tafondrondrongo Li Lowalangi me imane:
- ❖ Ba da’ö niwa’ögu: Na so zangatalisi tanömö, ba lö oya’oya ibasi, ba na so

zi lõ alimagõ tanõmõ, ba oya gõi ibasi dania. Ba balazi dõdõ zamõsana; bõi abu dõdõ, ba tenga niforege; si no aoha gõlõ fame'e, da'õ sa zomasi Lowalangi. (II Kor.9:6-7).

Tafa'ema wasõmbata khõ Lowalangi, manunõ ita moroi ba Mbuku Zinunõ
Numero 319

319. NA TA' OFANÖI TÖDÖDA 1

do = d 4/4

MM = 76 – 84

1. Na ta ' ofanöi tödöda wekolida ba danö
 Manueli ba manösö lala sero ma' ökhö.
 Fa ' ahakhö dödö Yesu samaeri sondrorogö.
 Ibè khöda wa ' abölö si lõ mamalö-malö.
2. Oya sa gameta' uö möi famangiwa dodo
 Si möi fombuwu wamati, na lõ fanaha tödö.
 Reff: Fa' ahakhö dödö Yesu
3. Da tatara lahe Yesu wolohe fangatulö.
 Me da' ö lala wogamö, naha si lõ tebulö.
 Reff: Fa' ahakhö dödö Yesu
4. Botoda ba fa' aurida, Ya' ia zamatörö.
 Lö fulitö wa takhamö naha sahono dödö.
 Reff: Fa' ahakhö dödö Yesu
5. He Ya' ugö talifusö böi abe' e dödömö
 Böi öwai aoha wanöndra fangorifi nosomö.
 Reff: Fa' ahakhö dödö Yesu
6. Na lõ sa fangesa dödö si tekiko nosomö.
 No ibaloi' ö narako naha wangerögarö.
 Reff: Fa' ahakhö dödö Yesu

SA :

Na no awai la'owuloi/lafa'ema wasõmbata, ba owulo tanö furi zangowuloi Fasõmbata, lafendrongagö wolohe fõna fasõmbata, ba la'o'ö gofanöwa note zinunõ (irama lagu).Fatua lõ möi ira wolohe fõna, ba imane Sangai Agendre:)

“Da tafasao wasõmbatada andre fõna Lowalangi,.....Muzizio ita fefu.....
 Manunõ ita moroi ba Mbuku Zinunõ numero 261

261. YA'E ZUMANGE 1

do = d 4/4

MM = 62 – 68

Ira'alawe

1. Ya ' e zu-ma-nge fa-sõmbata, ma ' o-he sumange Yehowa.
Iramatua
 Reff
 Ma'andrö khö-U fa-ho-wu'ö zu-mange ni 'o- hema khö-Mö
2. Ya'e zumange fasõmbata mabe'e soroi ba dödöma.
 Reff : Ma'andrö khö-U
3. Ya'e zumange fasõmbata buala si'otarai Nama.
 Reff : Ma'andrö khö-U
4. Ya'e zumange fasõmbata, boto, noso, ba fa'aurima
 Reff : Ma'andrö khö-U
5. Ya'e zumange fasõmbata, lõ irugi zomasi dödö-U.
 Reff : Ma'andrö khö-U
6. Ya'e zumange fasõmbata, ma'aohasi gölõ Zo'aya.
 Reff : Ma'andrö khö-U

FANGANDRÖ : (*Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'ofulu, owasa wanaru ma owasavwamasi, btn ba itema'ö sangai huhuo si fao taroma Li Lowalangi si faudu ba wasömbata ni'owuloi andrö*) **Mudadao Zato**

9. KOOR/VOKAL GROUP

SA : Da tafaogö dödöda ba wanuno Lowalangi faoma sinunö ni'olohesi:
Koor ba Vokal Group
a. Koor Jemaat
b. Kegiatan Koremda
c. Kegiatan Kom. Bapak
d. Kegiatan Sektor 1
e.
f.

10. MANUNÖ

SA : Da tafa'anö dödöda wamondrondrongo taroma Li Lowalangi, manunö ita moroi Ba Mbuku Zinunö **numero 163**

163. UHONOGÖ SIBAI DÖDÖGU

do = a, 4/4

MM = 76 – 82

- Uhonogö sibai dödögu ba wamondrondrongo li Mö Yesu Mangalulu ndra'odo föna-U ba gametahö-Mö ia da 'a Öbayoini Eheha-U Yesu dozigö mbanua samati khö-U. Ubokai dödögu khö-U Yesu nahia daroma li-U. Taroma li-Mö lö fa'atebulö menewi ma 'ökhö ba si 'ogötö'ö lö sa mamalö. Taroma li-Mö si möi fangabölö utema 'ö soroi ba dödö, tolo ba wolo 'ö.

11. HUHUAO SEBUA

SH : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
a. Fombaso taroma Li Lowalangi *Ngenungenu Yeremia / Ratapan 3:49-57 (Tuho ; Ahatö Yehowa Na Mu'ao Ndra'o / Tuhan Dekat Tatkala Aku Memanggil.)*
b. Fanuriaigö
c. Nitano ba dödö. *Ngenungenu Yeremia / Ratapan 3:57 (No'ahatö Ndra'ugö me mu'ao ndra'odo Khö-U, Ömane : Böi busi dödöu!)*
d. Fangandrö Fanga'aro'ö huhuo

SATO : Manunö : BZ. Numero 154 : 1

154. NO MAFONDRONDRONGO LIU ²

do = es 4/4

MM = 96 - 104

- No mafondrondrongo li-U, Lowalangi So 'aya. Tanö ba dödöma ia, fa böi olifuga. Fahowu 'ö ia khöma, ena 'ö ohahau dödöma fefu. Heta ba dödö zi lö sökhi, ma'o 'ö niwa 'ö-U.

12. TUHO WAMATI

SA : Me notarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida

SA+SATO : ❖ Ya'o mamati khö Lowalangi Ama si lö ambö fa'abölö, somböi banua si yawa awö danö.
❖ Ya'o mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amonio, Ono nono alawe

Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.

- ❖ Ya'o mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

13. ANGOMBAKHATA BA MBANUA NIHA KERISO

SA : Da tafondrondrongo gangombakhata:.....

MANUNÖ

SA : Manunö ita moroi ba Mbuku Zinunö **numero: 248 ayati 1-2**

248. NA FAO NDRA' UGÖ KHÖGU YESU

do = es 4/4

MM = 88 - 96

1. Na fao Ndra' ugö khögu Yesu, fatua so wa ' aurigu
Ba lö mangiwa ae dödögu, ya ' aro wamatigu khö-U
2. Ba lö sa' ae aombö dödögu, ba wofanö ba lalagu.
Me sawatö fangabe' egu, Keriso So' aya Yesu.

14. FANGANDRÖ SALAHI + FAMATENGE + HOWUHOWU

SH : Muzizio ita fefu, mangandrö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

SH + SATO : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

SH : **FAMATENGE + HOWUHOWU :**
Mi'angawuli si fao fa'ohahau dödö, ya tobali ami sura Keriso, samaduhu'ö Ya'la ba Lala wa'aurimi sero ma'ökhö, ba mitema (tatema) howuhowu Lowalangi :
❖ Ya mufahowu'ö ami/ita Lowalangi, Ya murorogö ami/ita
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

SATO : Manunö BZ.Numero 488 ayati 3

248. NA FAO NDRA' UGÖ KHÖGU YESU

do = es 4/4

MM = 88 - 96

3. Me khö-U So' aya utötöna gahonota wa' aurigu.
Andrö wa faduhu dödögu, Ya' ugö razo sindruhu.

SH : **YA'AHOWU**

SATO : **YA'AHOWU**